



Sujet 1999: D`Hauptstrooss – Narre

D`Hauptstrooss – Baustelle isch dr letschti Schrey
dört schaffed Lüt vom Marti und em Frey
was die leischte isch scho top
doch Terminplanig vo dr Gmeind isch en Flop.
Drum goth die Baustell au scho lang
im Komitee wird`s Angscht und Bang,
drum meinets: Das Joor liebi Narre
Diemer nit dur d`Hauptstrooss fahre.

Dr Brand Hekti meint: Sisich allerhand
will er het Angscht
um sini neu renovierti Wand
denn seit er und fot afo lache:
Jetzt chan ich an dr`Route en Grillstand mache.

Au mir vo de Dorfplatzrueche
dien die Situation verflueche
drum hemer d`Baustell uf eusem Charre
und mir Rueche gön als Hauptstrooss – Narre.

Mir froge eus nur wer sind die wahre Narre
sicher d`Ingenieure in ihre schigge Schale
hend sich s`liegt jo uf dr Hand
um es paar Wöcheli verplant.
Alli lüt wo an dr Hauptstrooss läbe
finde die Baustell es bitz denäbe
wägem Lärm und Gstank würd kein reklamiere
Ihrs Problem isch, sie chönet d`Auto nümme parkiere.

Dr Schüttestubewirt wie au dr Dario
nerve sich langsam aber sicher scho
will vo luter Abschränkige vorne und hinde
d`Gäscht die Beize nümme finde
das macht dr Dario immer wie wilder
drum stönd jetzt au überall sini Schilder.

Ob mitte im Dorf oder uf dr Autobahn
in dr Schwiz herscht en Baustelle – Wahn
uf dr N2 hemer welle luege wie sie schaffe
doch gseh hemer nur wie sie Pause mache
denn got`s los, ich frog: „Fönder afo chrampfe“
doch de uf dr Baustell duett nur ummestampfe
den meint er: „Du verzelle nit so Sage
nix arbeite, Giovanni firobe magge.“
Bi sonere Arbeitswuet, wo eus nit duett gfalle
stinkt`s eus hüt scho vor em Gallerieumbau Schwizerhalle.

De Wagezeddel wär also fertig
jetzt machemer no bitz Eigewerbig
will das Joor, sìsch wunderbar
git`s für euch e Rueche – Bar.
Am Zischtig und am Cherus diemer uf euch hoffe
will an dene 2 Dääg hemer ab de Ahti zobe offe
chasch eus ganz eifach finde
grad dört bim Schlossgarte unde inne.

Mir hoffe euch by eus z`gseh
denn chömer zäme eine neh
wenn nit: bis nögscht Joor, ohni Pflute
will den fahremer wieder uf dr alte Route.